

MONASTERIORUM  
CISTERCIENSIVM FEMINEI SEXUS  
DE GRADEFES  
ET  
OTERO DE LAS DUEÑAS  
HISTORICA SYNOPSIS,

J. L. C. auctore



LEGIONE,  
TYPIS MARIANI GARZO,  
MDCCCLXXXIII.

9951

R/45.083 FONDO ANTIGUO

MONASTERIORUM  
CISTERCIENSIVM FEMINEI SEXUS  
DE GRADEFES  
ET  
OTERO DE LAS DUEÑAS  
HISTORICA SYNOPSIS,

J. L. C. auctore



LEGIONE,  
**TYPIS MARIANI GARZO,**  
MDCCCLXXXIII.



PERILLUSTRI AC REVERENDÆ M. D. BER-  
NARDÆ PRUDENTIÆ MOLINA, MONASTERII  
*de Gradefes* MODERATRICI.

Narratiunculam monasteriorum cisterciensium  
feminei sexus, Legionensi Episcopo subjectorum,  
quam olim ab Ordinis generali Historiographo  
rogatus concinnavi et edidi, nonnihil auctam tuis  
precationibus obsequens denuo typis mandavi.

Faxit Deus ut adeo exiguam opellam, quamvis  
laudabili tuo desiderio exsolvendo omnino im-  
parem, benevole accipere pro tua benignitate **non**  
dedigneris.

Vale et ora pro me

J. L. C.





*Monialium Cisterciensis Ordinis  
in diæcesi Legionensi Monasteria.*

---

B. Bernardi doctrinæ sanctitatisque fama è Claravallensi monasterio exsiliens universam qua latè patet Ecclesiam pervaserat, nomen decusque concilians Cisterciensi instituto, cuius religioso habitu insignitus fuerat, ut solet patri filius rectè moratus. Hinc christianarum pleræque nationum nihil habuefunt antiquius quam ut novam monasticam familiam, quæ tales scientia et virtute alebat natos, certatim susciperent et sedulo propagarent. Quod in aliis regionibus acciderat non poterat non evenire in nostra Hispania, in qua veluti in proprio solo egregia quæcum-

que opera imis latisque radicibus coalescunt; potissimum cum soror Imperatoris Sancia, Justitiæ culmen et Pietatis apex jure merito appellata (1) et Abbatem Claravallensem, cuius familiaritate (2) utebatur, et sacrum cui militabat ordinem quantum in se erat diligeret. Tale enim exemplum à summo apice descendens non poterat non ad imitandum allicere. De asceteriis Cisterciensium monialium in Legionensi diœcesi fundatis vel Legionensis episcopi in ditionem concessis solummodò acturus, ne in alienam segetem falcem mittere videar, non sine animi mœrore, prætereundum duxi quæ et quanta erga Cisterciense institutum, in Regnis fratris sui imperio subjectis, princeps illa piaque femina fecerit. Ab omni ergo

---

(1) Epitaphium Sanciæ in Legionensium Regum Pantheo.

(2) S. Bernardus Epist. 301. Sanciæ sorori Imperatoris Hispaniæ anno 1149.

alia re distractus commissum mihi munus protinus aggrediar.

Duo tantum Monialium Cisterciensis ordinis monasteria, quod sciam, in Legionensi diœcesi ad hoc tempus exstiterunt, scilicet quod vulgo dicitur *de Grandes* et quod *de Otero de las Dueñas* nuncupatur, sumptis nominibus à locis ubi ab ipsorum conditoribus sita fuere; quod quidem secundum adauxit cognomine ab ipsis religiosis feminis illud incolentibus mutuato. Primum adhuc floret, aucta ejus communitate accessione Sanctimonialium ejusdem instituti, quæ olim in monasterio S. Bernardi *de Aviles*, Ovetensis diœcesis, Deo se mancipaverant. Secundum ad nostram usque tempestatem viguit, ad annum videlicet 1868, quo ejus Monachæ expulsæ ab impio Gubernio, ex communi rerum perturbatione oborto, inter Ascetrias parthenii *de Villoria*, ordinis Præmostratensis, ad Asturicensem diœcesim spectantis, hospitii vel potius refugii locum invenerunt. Non

\*

multis ab hinc diebus Moniales supers-  
ties *de Otero*, amore propriæ ordinis  
percitæ, præfatum monasterium *de Gra-  
defes* petierunt, ibique apud sorores  
magna lætitia et communi gaudio de-  
gunt. Pauca de utrisque, sed satis eli-  
quata singillatim dicam.

*S. Mariæ DE GRADEFES monasterium*

---

*Gradeſes* oppidum est ad dexteram  
fluminis *Esla* situm, quinque à Legio-  
nensi civitate leucis, quà ad orientem  
vergit, intra hujus provinciæ et dioce-  
seos fines. In hoc loco, aëris placida  
suavitate, terræque uberibus fructibus  
valde commendato, fundatum est an-  
no 1168 Monialium monasterium sub  
advocatione S. Mariæ, religiosa pietate  
nobilissimæ feminæ D. Teresiæ Perez (1),  
viduæ D. Garciae Perez, prædicti loci to-

---

(1) Manriquius, Annal. Cisterc. tomo 2, pro  
Perez habet Garcia, quod est nomen viri.

parchæ, pari nobilitate, ut pote uterque Regiæ Aragonum domûs sanguine cretus. Juvenis adhuc cum ejus vir è vita decessisset, Deo se totam suaque omnia devovere constituit. Itaque in cœnobio ab ipsa non mortico sumptu constructo, simul cum aliis adolescentulis, partim consanguineis, partim domesticis, quæ eam sequi voluere, nonnullisque Monialibus è Tulebreensi cœnobio S. Mariæ Charitatis sacro, Turiasonensis diœcesis, ad id opus adductis, sese recepit, votaque religiosa emitens sub Regula S. Benedicti juxta Cisterciensem Reformationem, Abbatissaque communi suffragio renuntiata, insigni monasterio S. Mariæ *de Graefes*, Cisterciensis ordinis, fundamenta jecit. In professione ut mos est Mariæ nomen sibi adscivit, retinens tamen prius Teresiæ: idcirco in syngraphis, ipsa Abbatissa, confectis modo Maria modo Teresia nuncupatur. Obtulit etiam monasterio pro cultus et monialium sustentatione, ædificiique conservatione perplura oppida ut *Gra-*

*defes, Llamas, Herreros, Villaverde,  
Valmatado, Mansilla Mayor, Quintanilla del Paramo, Villamudarra et alia  
quæ cum summo in ea imperio à rege  
Alfonso VII, imperatore cognominato,  
dono acceperat vir ejus ob sua in Saracenorum bello optime merita. Noven-  
nio post ecclesiam quæ nunc stat, juxta  
stylum quem dicunt latino-byzantinum  
ædificatam, commodulatione et venus-  
tate nulli secundam, adjunxit, prout  
habet sequens in lapide incisa inscriptio,  
parietem ipsius ecclesiæ adhærens.*

ERA MCCXV KLS MARCII FVNDATA EST  
ECCLESIA SANCTE MARIE  
DE GRADEFES AB ABBATISSA  
TARASIA

Ex lapidibus affabré perpolitis con-  
dita, tribus alis vel, ut jam receptus fert  
usus, navibus, fornicibus tectis, constat,  
quarum laterales in posticum centralis  
se jungentes hemicyclum constituunt,  
fenestris instructum, qui in tres absides  
defluit. Media navis extremis, id est  
australi et septentrionali, celsior, con-

tinet cellam, semiorbicam figuram referentem, septem circumornatam arcubus, totidemque fenestris, cuius centrum ciborium, veluti altaris umbraculum tenet. Haud difficulter animo subiit quantum majestatis templo superaddat deambulatorium quod, ut innuitur, à transepto circum sanctuarium decurrit. Si universa quæ interiùs exteriùsve hanc ecclesiam honestant singulatim enarrare liceret, neque columnas quæ centralis navis pilas ambiunt vel fenestris aptantur, neque capitella quibus illæ coronauntur, neque arcuum acutam formam semicircularemve fenestrarum, neque demum mensulas quibus absides extrinsecùs cinguntur omittenda fore videtur. Ad aream templi adeo decori et pulchri per unicam januam acutè arcuatam, serræque dentibus ornatam additus patet (1). Inter sepulcra quæ ingredienti se inspicienda offerunt unum

---

(1) F. J. Parcerisa, Recuerdos y Bellezas de España, Asturias y Leon. Madrid. 1855.

tantum dignosci potest, ac proinde hoc  
referre sufficiat, quod continet nempe  
statuam sacerdotis jacentem sequensque  
epitaphium:

AQVI IAZ DON NICOLAS  
QVE FVE CAPELLAN DESTE MONESTERIO  
ET CANONIGO DE LA EGLESIA  
DE LEON  
ET FINO DOMINGO XXII DEL MES  
DE MARZO ERA DE  
MIL E CCC E LXIV ANNOS

De alio in presbyterio sito, ad exu-  
vias fundatrixis ipsiusque viri forte des-  
tinato, licet prioris nihil unquam conti-  
nuerit, non remanet quidquam nisi  
statuæ jacentes. Cæterorum memoriam  
tempus edax, hominumque incuria veluti  
ex condicto ab integro deleverunt.

Vita functa est abbatissa Teresia in  
bona senectute era MCCLX, (1) quæ  
est annus 1222, ideoque dignitatem ab-

---

(1) Manriquius, loco citato, assumit eram pro  
anno, sicque ait Teresiam mortuam era MCCXXII,  
quæ respondet anno 1184.

batialem obtinuit per longum 56 (1) annorum intervallum. Ut ne mortua discederet à sororibus, quæ viventi adeo cordi illi erant, jacet in Capitulo; vir autem ejus in ecclesia juxta altare majus. In ipso Capitulo placida compositam pace quiescere fertur fundatrixis nemptem, Gradefiensem monacham, omni virtutum genere eximiam, cuius memoria, præter claram stirpem et sanctitatis famam, ita obliterata est ut etiam nomen desideretur. Quantum omnium virtutum genere claruerit Teresia apprime enarrat Menologium (2) Cister-

---

(1) Liber *Tumbo* vel *Becerro* vulgo appellatus, hortatu D. Mariæ de Quiñones Pimentel, abbatissæ perpetuæ S. Mariæ *de Gradefes*, à Fr. Matheo de la Vega, monacho S. Mariæ *de Sandoval*, anno 1594 conscriptus. Servatur in Gradefiensis monasterii tabulario.

(2) Menologium Cisterciense notationibus illustratum, auctore R. P. Chrysostomo Henriquez. Antuerpiæ MDCXXX. fol. Libet huc inserere ad notationem huic loco subjectam, quæ sic se habet.

ciense sequenti elogio: «Sextoidus Maii.  
»Hispania beata Teresia virgo, quæ in  
»Cœnobio beatæ Mariæ *de Gradefes* à se  
»constructo, disciplinis Cisterciensibus  
»se subjecit, et splendorem Regii sanguini-  
»nis admirandis virtutibus et miraculo-  
»sis operibus decoravit, et cæteris virgi-  
»nibus, quibus dignitate Abbatiali pru-  
»dentissime præfuit, egregia sanctitatis  
»exempla reliquit.»

Interfuit duobus Capitulis quæ in  
cœnobia S. Mariæ *de las Huelgas* prope

---

«Maii 10. Teresia. De ea scripserunt Petrus de  
»Urceyo in Hispanico Itinerario, Philippus Segui-  
»nus, libro 3 Sanctorum Ordinis Cisterciensis,  
»cap. 121, tit. De Sancta Teresa cœnobii *de Gra-*  
»*defes* abbatissa, ubi habet: Teresa virgo sanctis-  
»sima et celeberima, ex Regio Aragonicorum  
»sanguine oriunda, in Legionensi diœcesi Cœno-  
»rium, quod *de Gradefes* dicitur, sacris Virginibus  
»Cisterciensium Ordini consecratis exstruxit, egre-  
»gieque dotavit. In eo Cœnobia aliquot annis soli  
»Deo inserviens, multas virgines sub Religione  
»monastica aggregavit, quibus prima præfuit. Qui-  
»escit ibidem multis et sanctis operibus gloriosa.»

Burgos celebrata sunt. Primum die 27 Aprilis 1187, ut monasteria Monialium Cisterci in Castellæ et Legionis regnis constituta instar Congregationis compo- nerentur, illudque *de las Huelgas* ceu caput cætera agnoscerent. Secundum non multo post tempore, ut ea quæ, sicut Gradefiense, in priore submissio- nem non præstiterant, obedientiæ vin- culo quo tenebantur præpedita, illo so- luto, Abbatissæ Huelguensi subjiceren- tur. Qua facta submissione, obtenta ad id Tulebreensis Abbatissæ licentia, Ab- batissa *de Gradeles* pro tempore exis- tens cum tribus aliis, ordine vero se- cunda, deputatur ut annuatim visitatio- nem instituat monasterii *de las Huelgas* ejusque Abbatissæ et monialium.

Aviti Gradefiensis Monasterii splen- doris veluti vestigium existimari profecto potest patronatûs jus in plures ecclesias, quod olim habuit, et hactenus ex parte tenet; vi cuius penes eum erat nomina- tio in solidùm ad parochialia beneficia *de Gradeles, Herreros* cum *Valmatado*,

*Llamas, Villaverde la Chiquita, Valdepolo, Quintanas de Rueda, Garfin, Mansilla Mayor, Grajarejo et S. Clodio de Cornejos inter Villiguer et Villasabariego; unaque cum aliis patronis, ad parochialia de Villamuñio, Villalman, Vidanes, Valdealcon, Castellanos, Cásasola et Valdemorilla* (1).

Anno 1245 (2) ex monasterio Gradefensi ortæ sunt Sanctimoniales quæ, ab abbatissa D. Teresia Alfonso missæ, novum *de Otero* postea *de las Dueñas* cognitum, in Ovetensi diœcesi, incoluere, ibique Cisterciensem Militiam pretendere studuerunt. Ad hoc pium

---

(1) Libro de Advertencias y Avisos para los Mayordomos del Monasterio de Gradeles, por el P. Fr. Joan de Quintanilla, hijo de la Spina, 1610. En el archivo de Propiedades del Estado, de la provincia de Leon.

(2) Manriquius, Annal. Cisterc. tomo 3, leví conjectura ductus ait ex monasterio Gradefensi exisse sanctimoniales quæ in illo *de S. Columba prope Benavente* vitam monasticam anno 1181 inaugurarunt.

opus copiosam fecerat donationem D.  
Maria Nuñez de Guzman, comitissa *de  
Villalba de la Loma* hac conditione ut  
Abbatissæ *de Gradefes* potestati erigen-  
dum cœnobium perpetuo subjiceretur.  
Hinc evenit ut illius Abbatissa in hoc  
plena jurisdictionem haberet ut Mater,  
Antistita et legitima Administratrix.

Abbatissa Huelguensi adprecante, Leo  
papa X per Litteras Apostolicas die 13  
novembris 1517 datas interdixit sacros  
conferre habitus in monasteriis filiationis  
et obedientiæ illius Abbatissæ sine  
ejus licentia in scriptis, asignans cuique  
numerum religiosarum feminarum quæ  
recipi possent, qui in monasterio Gra-  
defensi in 20 ex iis quæ ad chorun*i* ads-  
criptæ sunt et 5 (1) conversarum quas  
dicunt consistit.

Sæculo XVI mediante Monasterium  
*de Otero* Gradefensem Abbatissam in

---

(1) *Medula Historica Cisterciense*, por Fray  
Roberto Muñiz, tomo v, Valladolid, 1786, 4.<sup>o</sup>.  
—A puntes Históricos sobre el Monasterio de  
S. Maria de las Huelgas, por D. José María Cal-  
vo, Burgos, 1846, 8.<sup>o</sup>

ius vocare apud Romanam Curiam ausum est, reverà ut ab ejus potestate se subduceret, prout jampridem tentarat, licet consilium tegeret abusus qui in ipsius exercitio irrepserant obtendens, ac præsertim quod vi usa fuerit in illud religiosum cœtum, ut reapse factum est ad Moniales *de Otero* quoad electionem Abbatissæ in officio retinendas. Sed post diuturnam contentionem quæ alternas obtulit vices, Sacra Rota Romana, habita filiationis ratione, inspeccaque fundatricis voluntate per definitivam sententiam statuit Abbatissæ *de Gradeles* pro tempore existenti licuisse et licere præfatum Monasterium *de Otero* ipsiusque Abbatissam et Moniales visitare, corrigere et castigare, electionemque Abbatissarum illius confirmare. Cui sententiæ, quæ firma declarata est, obedientiam præstiterunt Abbatissa et Moniales *de Otero*, præsente Abbatissa *de Gradeles*, die 23 octobris 1561 (2)

---

(2) Quintanilla, op. cit.

Quando in hoc cœnobio, juxta novum Regularium jus, post Tridentinum Concilium à Gregorio XIII in Const. *Exposcit* præcipuè statutum, Abbatissis perpetuis successerint triennales me planè latet; compertum tamen habeo hoc post annum 1594 eventum iri, etenim D. Maria de Quiñones Pimentel quæ hoc munere tum temporis fungebatur Abbatissa perpetua adhuc nuncupata in publicis tabulis reperitur.

Anno 1618 Moniales *de Gradeles* ad civitatem *Medina de Rioseco* translatæ sunt, orbum ab incolis oppidum et incommoda inde emergentia obtendendo, quasi stante monasterio in deserto loco urgeret monitum Tridentinum; sed ingentia damna præsertim in re familiari expertæ ad pristinum domicilium, gratulantibus Gradefiensiis, reluctantibus è contra Metymnensiis reddierunt anno 1623, duce D. Elisabetha Maria de Quiñones et Acuña, è Carricensi monasterio, in Asturicensi diœcesi, adducta in Abbatissam Gradefensis, sub cuius

docto regimine hoc cœnobium adeo floruit ut ejus ædificia in ruinam prona veluti è ruderibus erecta viderentur.

Ut usu receptum erat monasterium Gradefiense jure filiationis Tulebreñi ab initio subdictum fuit; sed anno 1189 in hoc jure suffecta quoad monasteria Castellæ et Legionis Abbatissa S. Mariæ *de las Huelgas*, quæ ut notum est ex tunc, singulari prorsus privilegio, potestate quasi episcopali polluit, à præfata Abbatissa dependere cœpit Gradefiense. Nihilominus ab ordinario loci non omnino tunc temporis exemptum fuit, nam era MCCCVII, quæ respondebat anno 1269, abbatissa Onega (1) cum omnibus Monialibus obedientiam et subjectionem vovit Episcopo Legionensi juxta Regulam S. Benedicti, *salvo ordine suo*. Nunc autem plenæ jurisdictioni Legionensis Episcopi ceu jure postliminii restitutum est. Litteris enim Apostolicis *Quæ diversa fel. rec. Pii*

---

(1) España Sagrada, tomo xxxv.

papæ IX die 14 julii 1873, quibus pri-  
vilegiatæ omnes jurisdictiones in His-  
paniarum regnis extinguntur, subjecta-  
que territoria, loca, monasteria propriis  
vel finitimiis diœcesibus adjunguntur,  
Abbatissæ Regalis domûs S. Mariæ *de*  
*las Huelgas* in cætera Castellæ et Le-  
gionis cœnobia jurisdictio penitus ces-  
savit, proindeque Monasterium S. Ma-  
riæ *de Gradefes* utpote intra Legionen-  
sis diœcesis fines constitutum, ejusdem  
Sedis Episcopo pro tempore existenti  
subjectum fuit, ut videre licet in De-  
creto die 24 Januarii 1874 Em. Cardi-  
nalis Moreno, Archiepiscopi Vallisole-  
tani, cui Apostolicarum Litterarum exe-  
cutio commissa fuerat.

Gradefiense cœnobium non modo lan-  
guebat sed penè jam finem attingebat  
plerisque monialibus naturali morte pe-  
remptis, quin aliæ religiosæ feminæ  
migrantium partes susciperent, cum Le-  
gionensis Episcopus Exc. ac Ill. D. Sa-  
turninus Fernandez de Castro, postea  
Burgensis Archiepiscopus et jam pri-

dem è vivis sublatus, tam piæ domûs servandæ desiderio æstuans, illud veluti è cineribus excitavit. Sciens enim Moniales parthenii S. Bernardi *de Aviles*, Cisterciensis ordinis in diœcesi oveten-  
si, ex quo è suo domicilio à victrici per-  
duellione fuerant avulsæ anno 1868 in  
monasterio S. Pelagi ï *de Oviedo*, ordi-  
nís Benedictini, ac proinde extra suum  
institutum vitam agere, seu verius hanc  
sacram familiam ex defectu propriæ do-  
mûs exinanitione interire, nullum non  
movit lapidem ut hunc Ascetiarum  
coëtum monasterium S. Mariæ *de Gra-  
defes* attraheret. Hoc modo communi  
utriusque religiosæ familiæ necessitati  
consultum volebat. Laudabilia adeo de-  
sideria, Deo juvante, felicem effectum  
obtinuere; nam, adepta Ovetensis epis-  
copi venia, die 14 mensis decembris  
anni 1880 Moniales præfati monasterii  
S. Bernardi *de Aviles*, quibus nihil  
aliud in votis erat, prompto hilarique  
animo, laudantes Deum qui sic infeli-  
cis suæ sortis miseretur, ad cœnobium

S. Mariæ *de Gradefes* pervenerunt, ubi summa sororum ibidem commorantium et universi populi lætitia receptæ sunt. Post tam faustum eventum, nihil æquè prosperum incasum iri sodalibus Cisterciensibus existimari poterat; et tamen contigit. Etenim alia religiosa familia è loco suo similiter ejecta ad Gradefiense monasterium se contulit, Moniales nempe S. Mariæ *de Otero de las Dueñas*, quæ à proprio monasterio die 30 novembris anni 1868 vi expulsæ apud Ascetrias cœnobii *de Villoria*, ordinis Præmostratensis, in Asturicensi dioecesi, sexdecim annos ut hospitæ degerunt, donec proprii instituti amor tandem effecit ut quæ temporis injuriæ et hominum iniquitati supererant sponte sua remearent ad paternam domum unde majores sui septem retrò sæculis exierant, prout, bonorum omnium plausu die 12 septembris anni 1882 factum est.



*S. Mariæ de OTERO DE LAS DUEÑAS  
monasterium*

---

Quinque à Legione leucis, ad septentrionalem plagam, non longè à flumine *Luna*, lœva parte hujus alvei, stat vicus hispanè *Otero de las Dueñas*, qui ad legionensem provinciam, diœcesim vero ovetensem (1) pertinet. Cognomentum *de las Dueñas* à femineis sodalibus proculdubio mutuatum apertè innuit parthenium sub advocatione S. Mariæ Cisterciensis ordinis, illic erectum, de quo nunc sermo. Hujus originem, progressum et finem prout ex authenticis instrumentis in ipsius tabulario asservatis patet quanta possim brevitate enarrabo.  
D. Maria(2) Nuñez de Guzman, comitissa

---

(1) Manriquius, Apéndice ad III Annal. Cisterc. tomum, 5, non rectè ait S. Mariam de Otero esse in Legionensi dioecesi, cum sit in Ovetensi,

(2) Carta de donación. En el archivo del monasterio de Otero.

*de Villalba* (1) *de la Loma*, comitis D. Nunnii Melendez (2) filia, femina pietate non minus quam opibus insignis, era MCCLXXVIII, quæ in annum Domini 1240 incidit, egregiam Deo fecit donationem eo animo ut in S. Maria (3) *de Otero* parthenium Cisterciensis ordinis institueretur, hancque curam commis-

---

(1) F. J. Parcerisa, op. cit., errore deceptus asserit hoc monasterium fundatum à Comitissa *de Luna*. Comitis *de Luna* título primus omnium à rege Enrico IV (1454-1474) D. Didacus Hernandez de Quiñones fuit insignitus.

(2) Real Cedula de D. Juan I, dada en Medina del Campo á 23 de Diciembre de 1380. En el archivo del monasterio *de Otero*.—Nunnus vel Nuno Melendi, Menendi aut Menendiz legitur inter nomina Procerum confirmantium in tribus donationibus monasterio S. Petri *de Eslonza* ann. 1165-1175-1177, in duabus parthenio Legionensi S. Mariæ *de Carbajal*, 1175-1178, et in una monasterio S. Mariæ *de Sandoval*, 1180, Ferdinandó II rege, factis.

(3) *Otero* jam erat B. Mariæ dicatus antequam ibi Cisterciense monasterium fundaretur.

sit D. Teresiæ Alfonso, monasterii *de Gradeles* abbatissæ, statuens ut tam præfata abbatissa quam aliæ quædam in dignitate successores eamdem in novum monasterium potestatem et jurisdictionem haberent quam abbatissam *de las Huelgas* prope *Burgos* notum est gaudere super monasteria Cisterciensium monacharum in regnis Castellæ et Legionis (4). Eapropter ex Gradelesi monasterio deducta fuit religiosa colonia quæ anno 1245 hoc condidit cœnobium; quod quidem fundatricis munificentia et grato quem ab incunabulis exhalabat virtutis odore brevi adeo crevit tam facultatum quam honorum ac dignitatum copia ut et monasterium non modo prædia, sed integra oppida cum plena juris in eis dicendi potestate acquisiverit, et ejus Abbatissa præ-

---

(4) Fertur hujus Comitissæ sepulcrum illud esse quod in Ecclesia conspiciebatur è regione alterius à vulgo mythico heroi Bernardo del Carpio tributi.

claris titulis Comitissæ *de Villalba de la Loma* et Toparchæ *de Villacintor*, *Grajalejo*, *Mataluenga*, *Otero de las Dueñas* et duodecim servorum *de Vinayo* fuerit nobilitata. His etiam causis referendum sanè est quod asceterium *de Otero* jus haberet in solidū nominandi ad parochialia beneficia *de Villacintor*, *Mataluenga*, *los Barrios de Luna*, *Otero de las Dueñas*, *Benlleria*, *Villabandin* et *Grajalejo*, et ad simplicia *de Irede* prope *los Barrios de Luna*, *Vinayo* et *Valdefresno* prope *Canales de Luna*; et simul vel vicissim cum aliis Patronis ad parochialia *de Villalba de la Loma*, *Oncina*, *Villagonta* et *Saludes de Castroponce*, et ad simplex *de Grajalejo*.

Habita filiationis ratione, ut mos erat, et etiam expressa fundatricis ordinatione Abbatissæ S. Mariæ *de Grandes* potestati monasterium *de Otero* ab initio subditum fuit, salvo appellationis jure ad Abbatissam S. Mariæ *de las Huelgas* prope *Burgos*, cuius illa

communitas filia, hæc neptis existimabatur. Quo quidem jure perraro, si umquam, usum erit sodalitium *de Otero*, cum sæpe sæpius ad Pontificiam Sedem vel ad Apostolicum Nuntium in emergentibus quæstionibus, omissa medio recurrerit.

Nonnulli tamen jurisdictionis actus in hoc cœnobium sæculo XV desinente ab aliis Præsulibus exerciti perspicuè obstendunt quoddam deliquum passam **Abbatissæ de Grade** potestatem. Ex his referre juvat confirmationem Abbatissæ *de Otero* pro D. Mentia de Quiñones priùs ab Ovetensi episcopo D. Alfonso de Palenzuela die 9 julii 1482, deinde à Visitatore simulque Reformatore Cisterciensis ordinis in Hispaniarum regnis Fr. Petro, abate monasterii S. Mariæ *de Piedra*, Turiasonensis diœcesis, die 10 ejusdem mensis et anni factam. Quæ quidem ab Abbatia possessione, instante Gradeensi abbatissa Catharina, Fr. Antonii de Moros deputati Abbatis præfati monasterii *de Pie-*

*dra* mandato dejecta, decretoria sententia à judicibus apostolicis quos Sixtus papa IV, deposita Abbatissa expos tulante, constituerat die 6 aprilis 1484 lata, in pristinum honorem ac dignitatem fuit restituta, remota D. Maria de Robles quæ, contempta appellatione à D. Mentia interposita, in ejus locum suffecta fuerat; cumque interjecta fuisse set appellatio à Gradefensi Abbatissa, nova sententia à judicibus apostolicis quos Innocentius papa VIII dedit die 5 martii 1489 pronuntiata, prior in omnibus suis partibus confirmata est (1).

Quod non rarò evenit, materno filialique amore temporis tractu frigescente, ægrè ferebant Moniales *de Otero* dependentiam ab Abbatissa *de Gradeles*, ut patet ex protestationibus ac litibus quibus talis jurisdictionis exercitium ab illis crebrò impetrabatur. Inter hæc

---

(1) Compulsoriales expedidas en Roma á 18 de Noviembre de 1546. In monasterii *de Otero* tabulario.

jurgia nullum fortassè gravius quam quod exarsit mortua abbatissa D. Francisca de Acuña. Obtinuerat à Leone papa X die 17 martii 1520 ob inimicitias, discordias et odia inter utrumque sodalitum *de Otero* nempe et *de Gradefes*, præcipuè exorta hujus Abbatissæ electionis occasione, quam ea quæ erat *de Gradefes* confirmare renuens confirmavit Deputatus Ordinis Reformatoris, roborabitque ipse met Romanus Pontifex 14 aprilis 1514; obtinuerat inquam speciale Breve Apostolicum quo, dum ipsa vixerit dumtaxat, Abbatissæ monasterii *de Gradefes* sufficiebatur Abbas asceterii S. Mariæ *de Belmonte*, ejusdem ordinis, Ovetensis diœcesis, quoad visitationem et correptionem monasterii *de Otero*, necnon ejus Abbatissæ et monialium. Ex hoc singulari casu occasionem arripuerunt Moniales *de Otero* sese exsolvendi à potestate Abbatissæ *de Gradefes*, afferentes se nulli subditas et subjectas esse in visitatione et correptione nisi Prælatis

datis et deputatis per Sedem Apostolicam. Proinde, inconsulta Abbatissa *de Gradeles*, elegerunt in Abbatissam monasterii *de Otero* D. Beaticem Cabeza de Vaca. Erat tunc temporis Abbatissa monasterii *de Gradeles* D. Anna Ramirez de Quiñones, quæ cum nuncium accepisset de electione, se inscia peracta, propria jura ac privilegia sarta tecta servare studens, illicò armata manu petitivit (2) monasterium *de Otero*, ibique constituta compulit moniales novam electionem, se præsente, efficere, et electam, quæ ipsamet D. Beatrix Cabeza de Vaca fuit, præstare illi obedientiam et jurare de stando semper obedientiæ Abbatissæ pro tempore existentis *de Gradeles*. Hac causa ad Sedem Apostolicam anno 1546 ab Abbatissa *de Otero* delata, Sacra Rota Romana die

---

(2) Ante Tridentinum Concilium, quemadmodum cæteræ Abbatissæ alia præter proprium coenobia sub se habentes, per se ipsam, post autem per Commissarios visitabat.

26 junii anni 1560, utrisque partibus auditis, solemniter declaravit jus confirmandi electionem Abbatissarum monasterii *de Otero*, visitandi ac corrigendi ejus Abbatissam et moniales spectare ac pertinere Abbatissæ pro tempore existenti monasterii *de Gradeles* tamquam illius matri et superiori (1). Sed cum pax quæ jampridem desiderabatur non inde exurgeret, jussu et auctoritate Romani Pontificis S. Pii V instituta fuit monasterii *de Otero* Apostolica visitatio quæ anno 1575 ad effectum perducta (2) est; sed incassum quæcumque scitè et cordatè præscripta, cum quæ parere debuerant mandatis non steterint.

Anno 1598 adhuc in monasterio *de Otero* non erant inductæ Abbatissæ triennales, etenim D. Francisca de Acuña Osorio quæ hoc eodem anno præ-

---

(1) Ejecutoriales expedidas en Roma en julio de 1560. En el archivo del monasterio *de Otero*.

(2) El expediente de esta visita se guarda en el archivo del monasterio *de Gradeles*.

dictum asceterium moderabatur Abbatissæ perpetuæ in publicis actis nomen fert.

Præfatam potestatem servavit illæsam Abbatisa *de Gradeles* usque ad annum 1796. Hoc vero tempore prisca illius Abbatissæ in monasterium *de Otero* auctoritas penitus deleta est. Hujus eventus causam summatim refferam. Apostolicus Nuntius in Hispaniarum regnis, suscepta denuntiatione Abbatissæ *de Gradeles*, simul cum valida Catholici Regis commendatione, de collapsa religiosa disciplina inter Moniales S. Mariæ *de Otero*, visitationem Apostolicam hujus monasterii ordinavit, commissitque Lic. D. Augustino García de Atocha, archidiacono *de Benavente* in cathedrali Ovetensi. Peracta visitatione, inter alia proposuit Delegatus, prout jam antea ipsæmet Sanctimoniales enixe petierant, quod abolita jurisdictione Abbatissæ *de Gradeles*, curæ pastorali Legionensis Episcopi utpote vicinioris Ovetensi cuius est territorium, monasterium *de*

*Otero* commendaretur. Sedes Apostolica huic propositioni benignè annuens per Litteras fel. rec. Pii papæ VI die 14 aprilis 1795 præfatum monasterium *de Otero* à dependentia et subjectione Abbatissæ S. Mariæ *de Gradeles* et cuiuscumque Superioris Cisterciensis ordinis sejunxit, Legionensisque Episcopi spirituali jurisdictioni omnino subdidit. Quæ resolutio plenum sortita est effectum per Litteras executoriales Apostolici Nuntii die 2 maïi 1796, et per acta episcopalia 14 et 15 septembris ejusdem anni (1).

Vigebat monastica disciplina sub paterna præfectura Legionensis Episcopi cum facta publicæ rei sus deque conversione, Monasterium S. Mariæ *de Otero* fluctibus illius diri turbidique

---

(1) Testimonio de la visita apostólica en el monasterio *de Otero de las Dueñas*, hecha por el Licenciado D. Agustín García de Atocha, arcediano *de Benavente* en la Catedral de Oviedo, en 1794. En el archivo episcopal de León.

maris raptatum est. Anno enim 1868, die vero 30 novembris, expulsis Monialibus jussu tam immanis quam impii Gubernii, subversæ societatis legitimi fœtus, monasterio unà cum ecclesia non multo post funditus everso, hæc religiosa ædes, sanctarum virginum olim habitaculum, communi illius populi finitimorumque omnium planctu miserè periit. Sic quod effrenes perditissimique homines tumultuatim inceperant, ferrum et ignem tum asceteriis, tum veri Dei templis admoventes, iidem ipsi supremæ potestatis jam usurpato nomine contra jus et fas ad finem detulerunt.

Hoc cœnobium eximiis virtutibus illustravit V. D. Lucia Francisca de Losada et Quiroga in oppido vulgo *Cubillos*, Asturicensis dioecesis, die 13 decembris 1654 nobilibus piisque parentibus orta. A teneris annis magni habens carnis munditiam virginitatem Deo vorerat; quapropter etiam si eam matrimonio appeterent nonnulli non certè

infimæ conditionis viri, ut par erat cum ageretur de filia toparchæ *de Cubillos*, *Cubillinos*, *Cabañas de la Dornilla* et *Finolledo*, et nepte Vicecomitis *de Quintanilla de Florez*, in qua præterea hæc stirpis decora animi celsitudine corporisque venustate extollebantur, omnes tamen Christo Jesu quem sibi sponsum elegerat posthabuit. In præfata domo ingressa ut hospita die 15 octobris 1685 Cisterciensi militiæ nomen datura, aliquod post tempus habitum induit, tyrocinioque optimè expleto monasticam professa est Regulam sub nomine Angelæ Franciscæ à Conceptione. Quamvis non modo doctrinæ sed morum integritate clareret, hinc educta est Sacri Consilii periclitandæ fidei jussu malevolæ delationis causa, et in monasterio Vallisoletano SS. Joachim et Annæ sacro, Cisterciensis etiam Ordinis sed extictioris observantiæ die 15 octobris 1692 deposita, ut ibi de ipsius vitæ ratione accuratum examen institueretur. Ab omni doli labe immunis declarata

die 10 julii 1696 suique juris effecta, austrius institutum jamdudum anhe-lans, hoc in parthenio Cisterciensem vestem denuò sumpsit die 15 augusti 1697, solutaque dote à consanguineo suo Marchione *de Inicio* professionem emisit, cognomine à Conceptione pro à Cruce commutato. Quibus in ædibus, vitæ curriculo emenso, dives virtutibus, divinisque charismatibus cumulata, Ab-batissa existente, anno 1710, die vero 16 julii, spiritum Deo redidit, magna cum sororum ædificatione, nec minore mœstitia, quæ se presertim exhibuit in ejus parentalibus, in quibus vix pote-rant temperare à lacrimis. (1)

---

(1) Vida de la V. M. Sor Angela Francisca de la Cruz, por F. Pablo Yañez de Avilés. 2.<sup>a</sup> edición, Valladolid por Tomás de S. Pedro Cal-deron. 1752.—4.<sup>o</sup>



## Index.

	Pag.
Perillustri ac Reverendæ M. D. Bernardæ Prudentiæ Molina, Monasterii <i>de Grade- fes</i> Moderatrici ( <i>Nuncupatio.</i> ) . . . .	3
Monialium Cisterciensis Ordinis in diœce- si Legionensi Monasteria. . . . .	5
S. Mariæ <i>de Grade</i> fes monasterium. .. .	8
S. Mariæ <i>de Otero de las Dueñas</i> monas- terium. . . . .	24





